

<?xml version="1.0" ?>			
<?xml-stylesheet type="text/css" href="home.css"?>			
<Doc id="bod-w-media-	BD00018	"	lang="Bodo">
<Header type="text">			
<encodingDesc>			
<projectDesc>	CIIL-Bodo Corpora, Monolingual Written Text		</projectDesc>
<samplingDesc>	Simple written text only has been transcribed. Diagrams, pictures, tables and verses have been omitted. Samples taken from page 2-3, 8-9, 14-15, 20-21, 26- 27, 32-33, 40-41, 48-49, 54-55, 64-65		</samplingDesc>
</encodingDesc>			
<sourceDesc>			
<biblStruct>			
<source>			
	<category>	Aesthetics	</category>
	<subcategory>	Literature-Novels	</subcategory>
	<text>	Book	</text>
	<title>	sAsE bOrAi ArO laithO	</title>
	<vol>		</vol>
	<issue>		</issue>
</source>			
<textDes>			
	<type>		</type>
	<headline>		</headline>
	<author>	ArNESTa hEmiMvE	</author>
	<translator>	Da. anila bara'	</translator>
	<words>	2671	</words>
</textDes>			
<imprint>			
	<pubPlace>	India-Basugaon	</pubPlace>
	<publisher>	baDa' pAblikEsana barDa	</publisher>
	<pubDate>	2002	</pubDate>
</imprint>			
<idno type="CIIL code">			</idno>
<index>	BD00018		</index>
</biblStruct>			
</sourceDesc>			
<profileDesc>			
<creation>			
	<date>	10-Feb-2006	</date>
	<inputter>	Tumpa Dattagupta	</inputter>

	<proof>	Bridul Basumatary	</proof>
</creation>			
<langUsage>		Bodo	</langUsage>
<wsdUsage>			
<writingSystem id="ISO/IEC 10646">Universal Multiple-Octet Coded Character Set (UCS). </writingSystem>			
</wsdUsage>			
<textClass>			
<channel mode="w">		print	</channel>
<domain type="public">			</domain>
</textClass>			
</profileDesc>			
</Header>			
<text><body>			
<p>	बै दिनखालि जायफोरा ना हमनो हादोंमोन, बिसोर नाखौ गुदामसिम लांदोंमोन। ना फोरखौ दैथाय हरनाय जागोन हाभानानि हाथाइयाव। हाभानासिम बरफनि मालगारि थाडो। जायफोरा हाडर हमनो हादों बिसोर हाडर फोरखौ लैथोसानि गुबुन फार्से थानाय कारखानासिम लानानै थाडो। बेयाव हाडर नि बिखा बिखलो दिहुननाय जायो, गां फोरखौ दानस' नाय जायो आरो बिगुर सेलायनानै संखि फुननानै दोननो थाखाय फिसा फिसा गोदानाय जायो।		</p>
<p>	सानजार्थिनि फ्राय बारबोनाय बार आ हाडर कारखानानि फ्राय अगाले अगाले मोनामनाय लाबोफायो। दिनै नाथाय एसेबां गोख्रों मोनामनाय फैयाखै। बार आ दिनै साहा फार्से दावखोना लासै लासै जिरायदब हैदों। टेरास सायाव दुंबुर साननि सानदुं नांफैदों। गोदै, दुंबुर, ख'हाब होनाय सानदुं।		</p>
<p>	गथ'आ गाबजिनायसै, "सान्टियाग'।" आखायाव गिलास लानानै बोराइ आ माबा माबि सानहाब दोंमोन। हरखाब हुस मोनखांनाय बाइदि बोराइ आ बुडासै, "हुं"		</p>
<p>	"गाबोन थानानै नोंनि थाखाय मानैसो सार्दिन ना लाबोनो नांगौना ?"		</p>

<p>	“नाडा नों बेस बल गेले है। आं बैथा बुनो हानायावनो दं। र’जालिव आ जे खौ सारनो हागोन।”	</p>
<p>	“आं जोबोर जानो लुबैदों। ना मोनो मोना गुबुन बथा, नोंखौ हेफाजाब खालामनो मोनोब्ला आं जोबोर गोजोननाय मोनो।”	</p>
<p>	“बथलसे बियार बायनानै होबायआनो माथो। अ’ नों माथो साननैसोनि गेजेरावनो सेंग्रा देरबाय आनो ?” बोराइ आ बुंबाय।	</p>
<p>	“आंखौ नोंनि दिडाआव लांजेन खालि आंनि बैसो आ बेसे जांखोमोन ?”	</p>
<p>	“बा बोसोर। बैदिन खालि जों मासे गेदेर ना हमदोंमोन। आरो दसे उनाव बे नाया जोंनि दिडाखौ खोन्दो खोन्दो बाइफले होजोबसिगौमोन। नोंथ’ थैनोनो ओंखारदोंमोन। गोसोआव दड’दा ?”	</p>
<p>	“दं, गोसोआव दं। बै दि नाया गांजों गोबारै बुदोंमोन, बैथानि हमखाया बायदोंमोन आरो थांगोनजों बुनाय बाइदि सोदोब जादोंमोन। आंहा गोसोआव दं नों आंखौ जलदब गारसोना दोनदोंमोन। दिडाया थुलुं फुलुं मावखांदोंमोन। थांगोनजों नों नाखौ ओरै बाइदि बोलो होनानै बुदोंमोन दि बंफां दाननाय बाइदि सोदोब जादोंमोन। आंनि देहाया गोथां थैनि मोनामनायजों साथिफबदोंमोन।”	</p>
<p>	“जागासिनोदं” होनना बोराइआ सिखारनायसै। रादाब बिलाइखौ खननानै दोननायसै आरो बिनि युनाव कम्बलखौ खननो हमनायसै।	</p>
<p>	गथ’आ बुंनायसै, “कम्बलखौ जोमनानै ला। आं थासान्दिआव नों जेबो जायालासिनो ना हमनो थांनो मोना।”	</p>
<p>	“बिब्दिब्ला नों गोबां सान थांनानै था। गावनि देहानि फार्से नोजोर हो। दानिया मा जानांगौ बुं।”	</p>

<p>	“गोसोम गरसि आरो ओंखाम; लोगोआव थालिर एवनाय आरो एसे बेदर रुनाय।”	</p>
<p>	जाग्रा मुवाफोरखौ खुदियाया लाबोदों टेरासनिफ्राय गंसे खलपनै गोनां आइजेंआव। सिफियाव सोनानै लाबोदों लेखा बिलाइ जुनाय सेट मोननै, गारबा फिसा आरो काटलेट।	</p>
<p>	“बेफोरखौ सोर हरनाय ?”	</p>
<p>	“बै दि मार्टिन माहाजोन दं। बिनो हरदों।”	</p>
<p>	“बिनो साबायखर होनांगोन।”	</p>
<p>	“नों दा आरो साबायखर होनांलिया। आं होबोबाय।”	</p>
<p>	“आं बिनो मासे ना गेदेरनि उदैफार्सेनि बेदर हरगोन। सिगाडावबो बियो बिब्दिनो माबामाबि हरदोंमोन नामा ?”	</p>
<p>	“औ”	</p>
<p>	“बिदिब्ला बै बेदरजौल’ जानाय नडा; आरोबाव माबामाबि हरबावनांगोन। आं जा नुबाय बेमानसिआ जौनि थाखाय गोबां सानो।”	</p>
<p>	“बथलनै बीयारबो हरदोंमोन।”	</p>
<p>	“आं टिनाव दोननाय बीयारखौ जोबोर मोजां मोनों।”	</p>
<p>	“आं मिबथिगौ। नाथाय बेफोर बथलाव दोननाय बियारसो। बथलफोरखौ हरफिननांगोन।”	</p>
<p>	बोराइआ बुंनायसै, “जा नुबाय, नों जोबोर अनसुला। दा जाथार नांसिगोन नामा ?”	</p>
<p>	“खनब्रैसे बुंनांगौ ? नोंजायागौमानि आं आइजेंखौ खेवा होनाखैमोनदा ?” गथ’आ गोमजोरै बुंबाय।	</p>
<p>	“दे दे जादिनि दे। आखाय सुनायआवसो सम लाबाय।”	</p>
<p>	गथ’आ सानहाब बाय बोराइआ आखाय-आथिं आरो मोखां सुयो बोरै ! दैखौ लामा देंग्रायनानै थांब्ला सो मोनो। बोराइनो लाबोनानै होफैनांगोन। साबोनआरो गांसे गामसाबो नांगोन। अ	</p>

	बोराइनोथ' आरो गोबां माबा माबि नांगौ। गांसे ग'स्ता गुदुं, कट, ज'था ज'रासे आरो कम्बल गांसे।	
<p>	बोराइनि बादियैब्ला लैथोआ जाबाय सासे आइजो। सासेआइजो बाइदिनो एखनब्ला अनसायो आरो एखनब्ला नेवसियो। माब्लाबा बियो गिथावथाव जायो आरो इनाय मावो। मिबथिनांगोन दि बियो जेबो मावनो हायिनिसो बिब्दि मावदों। बोराइआ सानो दि आइजोफोरनि सायाव अखाफोरा गोहोम खोलैनाय लेखा लैथोनि सायावबो गोहोम खोलैयो। लैथोआ लासै लासै सिगां लांदोंमोन। बैथा बुनायाव जेसेबां बोलो नांगौ बिनिखुइ बांसिन बोलोजों बैथा बुना सिगां लांनो बियो गोसो जायाखै। लैथोआ दिदोममोन; बिनि दोहौ फोराल' समसम मोसाबायदोंमोन। दोहौफोरनिफ्राय बोराइया थामबाहागोनि से बाहागो बोलो मोनदोंमोन।	</p>
<p>	इसे सोरां जाबोनाय लोगो लोगो बोराइया नुनो मोनबाय बियो लुबैनायनिखुइ बांसिन सिगां बोनो हाबाय। बियो सानहाबबाय, "स्निसान नाजासेआवबो जेबो सुबिधा खालामनो हादिया। दिनै गेदेर गेदेर ना दावबायग्रा जायगायाव नाजानायानो गाहाम जोगान। हरखाब गेदेर ना नांगारनो बो हागौ।"	</p>
<p>	दाबो मोजाडै स्रांआ साग्लोबजोबाखै। बियो बोरसि आदार फोरखौ दिहुननानै लानायसै आरो नैजौ ब्रैजि फुट सिं सिम मोनसे खुबै हरनायसै। मोनसेखौ खुबै हरनायसै ब्रैजौ बाजि फुट सिंसिम। थामथिखौ खुबै हरनायसै द'जौ फुट सिंसिम। ब्रैथिखौ खुबै हरनायसै स्निजौ बाजि फुट सिंसिम। दै सायाव गोजावबाय थानाय थुंगाफोर थब्ल'हां जानायसै। बोरसिआव ना सुथाबना होनाय जादोंमोन- जाहाथे गेदेर नाफोरा बोरसि आरो नानि फाराखथिखौ हमदांनो हाया।	</p>
<p>	गथ'आ बिनो मानै फिसा 'टुथ' एबा एलबेकार ना होफेदोंमन।	</p>

	<p>बोराइया बे मानैखौबो दै सिं सिम खुबैहरनो हानाय दोंनै दिरुंआव खानानै होनायसै। गुबुन दिरुं दोंसेआव खानायसै मासे नकल गुमा गोथां। गुबुन दोंसेआव खानायसै मासे नकल गुमा गोथां। गुबुन दोंसेआव खानायसै मासे गुमा गोमो। गुमा मानैखौ सिगाडावनो बाहायनाय जादोंमोन ब्लाबो गाज्जि जायाखैमोन। गेदेर पेन्सिल बाइदि गेदेर दिरुं फोरखौ बंफां थारायाव औरै बाइदि हेबनाय जादों मोनदि आदारआव एसे बोब्लानो थाराया दैयाव गब'यो। बिनि अनगायैबो दोंफ्रामबो दिरुंजों नैजौ ब्रैजि फुट गोलाव दिरुं नि मुस्ता दंमोन। नांगौ जायोब्ला नाया दाइनजौ फुटसिम बोलांनो हाथाव बादियै दिरुं बे मुस्तायाव दंमोन।</p>	
<p>	<p>बियो मिबथिगौ दि बेयो बेस बलनि बाथा साननायनि सम नडा। जा खामानिनि थाखाय बिनि जोनोम बिनि बागैसो साननांगौ। बोराइआ सानहाबबाय बै नाफोरनि फालोआव मासे गेदेर ना थानो हागौ। गिदिं थिंबायनाय एलबेकार ना फोरनि मादाव आं मासे ल'सो हमनो हादों। दा बिसोर जोबोर गोजानाव थांबाय- जोबोर गोख्रै। सा-सानजा थिंजाय। आं सानस' हायि मोनसे आवहावा सोमजिखांदों।.....</p>	</p>
<p>	<p>लैथो जिंनि सोमखोर गाबआ गैलियामोन। गोथां हाजो फोरा बरफ गोलैनानै फुरगेव जादोंमोन। आरो गोजौआव बिरबायनाय जोमै फोरखौ गोजौ हाजोमाला बाइदि नुदोंमोन। लैथोनि दैनि गाबआ जादोंमोन जोखोल गोथां, बिनि सायाव साननि सोरां गोलैना सोमजि खांदों स्नि गाबनि आबिर। सानजुफु जाबायमोन। दै सायाव दावबायनाय लाख लाख जीवि फोरा मँग्लिबायमोन। बोरसिनि दिरुंआ दै सिंआव थोंजों हाबलांदों माइलसे गाहाय सिम।</p>	</p>
<p>	<p>टुना ना फोरा दै सिडाव गाव गाव देहाखौ दोनखुमा दोंमोन।</p>	</p>

	जेआरि फोरा बे ना फोरखौ टुना होन्ना बुडो। ना फाननाय समाव एबा सोलायसोल' खालामनाय समावसो नानि गुबै मुंखौ बाहायो।	
<p>	बोराइनि देहानिफ्राय गोलोमदै आँखार दोंमोन। बियो मिवथिना मोनबाय बिनि देहानि बिदुंआ बांलांदों। बियो दार बुगासिनो दं। बिनि बिखुडाव सान्दुं गोलैदों। बियो सानहाब बाय, “आंनि आथिंनि आसिआव बोरसि दिरुंखौ खानानै दसे गोलाननो हायो माथो। दिरुंखौ बोनाय लोगो लोगो आं सिरि मोनगोन। औ नडा; दिनै दाइन जिबा सानाव आगान होबाय, दिनै मोजाडै बोरसि बोननाया गाहाम।”	</p>
<p>	बे समावनो बोराइनि नोजोरआ गलैबाय दिरुंआव। बियो नुबाय गोजावबाय थानाय थुंगाया गब'लांबाय। बियो बुंबाय, “थिक, थिक।” बियो दिडाखौ जोबोर लासै लासै सालाय लानो हमनाय सै। लासै आखाय फोलाव हरनानै हमनायसै दिरुंआव। मोन्दांनोमोननायसै दि माबा गिलिर बेसात नानानै दं। दिरुंखौ दसे सम हमना लानानै आरोबाव खनसे बोनानै नायबाय। बियो मोनदांना मोननायसै दि, दजौ फुट सिडाव मासे मार्लिन नाया सार्दिन ना सुनानै दोननाय बोरसिखौ मन' गासिनो दं।	</p>
<p>	बियो दिरुंखौ गोहैलौयै हमनानै आगसि आखायजों दान्दानिफ्राय खेवनानै होनायसै। बियो आसि गब्लंजों दिरुंखौ ओरैवाइदि नागार हरनायसै दि नाया जेबो हमदांनो हायाखैसै।	</p>
<p>	“नाया दंमोन गोथौ, गोथां दै गेजेराव गासेबो रोखोमनि खैसारि, खायदा, थगाय थसिनिफ्राय जानगाराव। आंहा गोसो जादोंमोन मुलुकनि गासैखोबो एंगार लानानै दै सिडाव हावलांगोन आरो बिखौ नागिरनानै दिहुनगोन। जों सानैबो फेलें जादों बै सानजुफुनि फ्रायनो। जों सानैखौबो हेफाजाब खालामनो दा रावबौ गैया।” बिनि उनाव बोराइआ सानबाय,	</p>

	<p>आं जेआरि जानो हायाखै जानो हागौ; नाथाय बिब्दि जानो थाखायनो आंनि जोनोम जादों। सोरां जाबोनाय सिगांनो नाटुनाखौ जाजोब नांगोन।”</p>	
<p>	<p>सोरांनाय सिगांनो माबा जीवि एबा जुनातआ उनफार्से थानाय आदार फोरनि मोनसेखौ मन'नाय बाइदि मोनबाय बियो। बियो खोनानो मोनबाय सिबआ जेन' बायबाय आरो दिडा सेरजों बोरसिदिरुंआ हर हर ओंखार लांबाय। खोमसि आवनो बियो दाबाखौ बिख'पनिफ्राय बख'नायसै आरो एसे फासयलांनानै दिरुंखौ हास'नायसै। बिनि उनाव खाथि थाराव थानाय दिरुंखौबो हास'नानै दोंनै खौबो ज'रा फोनांनायसै। दा बिनि आखायाव दं बोरसि दिरुंनि मोन द' थावखि। जा बोरसिआव ना नांदों बिनि थाखाय दं मोननै थावखि। हास'नानै जुदा जुदा खालामनाय बोरसिनि आदार मोननैनि बो मोननै मोननै थावखि दंमोन। थावखि फोरखौ मोनसेजों गुबुन मोनसेखौ सुजाबना दोननाय जादोंमोन। बियो थि खालामनायसै दि, सोरांनाय लोगो लोगो बियो फासयलांगोन। आरो नैजौ ब्रैजि फुट-गाहायाव थानाय आदारखौ हास'नानै दिरुंखौ सिगां जरायनाय दिरुंजों जरा फोनांगोन। मासे गेदेर ना नांदों। बिखौ खोमानो हाया। गुबुन बोरसि फोरावबो जुदि ना नाडो, बे नाफोरा बे गेदेर नानि दिरुंखौ अरस'नो हागौ।</p>	</p>
<p>	<p>“गथ'आ आंजों थाफानाय मोनब्ला! “बियो हरखाव बुंखांनायसै। दसे उनाव सानफिननायसै, “बियोथ' नोंजों गैफाया। नों बेयाव हारिसो। नों दा बै जोबथा बोरसि सेराव थां, खोमसिआव ब्लाबो हास'ना हो आरो दिरुंनि बांद्राय थावखि मोननैखौ खाथुमना दोन।”</p>	</p>
<p>	<p>बियो बिखौनो खालामनायसै। नाथाय खोमसि गेजेराव बे खामानिखौ मावफुंनाया एफा गोर्ले नडामोन। नाया हरखाव</p>	</p>

	<p>गोजौ फार्से बाजल'खांनायसै। बोराइआ जलदब गोलैनायसै। बिनि मेगननि सायावनि बिगुरआ जखम जानायसै आरो खावलायजों रनारनि थै बोहैनो हमनायसै। बबेखानि गुसथि सेराव सौहैनाय लोगो लोगो थै आ रनथाबनो हमनायसै। बोराइया दिडानि फायखनसिम फासयबोनानै तकता सायाव सोनारनानै जिरायनायसै। बसथाखौ मोजाडै लानायसै। दिरुंखौ मोजाडै फाफिलनि गुबुन दाबसेजों थांनाय बाइदि लानायसै। फाफिल सासों दिरुंखौ बोयै बोयै गोहैलो नायहरबाय थाबाय नाया दिरुंखौ माबोरै बोयो बिनि फार्से। आखायजों दैआव खनसे दांनायनानै आनजाद नायनायसै दैनि खारथायखौ।</p>	
<p>	<p>बोराइआ नख्रांफार्से खनसे नायहरनायसै। जोमै दाखा दाखि ओंखारदों अनथाव बाथाव आइसक्रीम बाइदि। बिनि सासा बिरथिंबाइदों- सेप्टेम्बर दाननि नख्राडाव रुइदोब आरो गेर्से जोमैनि फाइलि।</p>	</p>
<p>	<p>“बारआ गेर्से” बियो बुंनायसै, “नै ना, बे बोथोरआ नौनि थाखै जेसे मोजां आंनि थाखाय बिनिखुइ मोजांसिन।”</p>	</p>
<p>	<p>आगसि आखाया दाबो मिजिउ गसिनो दं। बवेखानि आसि फोराव लोर्बा मोननायआ गैया जाबोनो हमबाय। बोराइआ सानबाय, “मिजिउहाबनाया जादों देहानि थाखाय फोथाय खेवस’। हार्सि समाव सासे मानसिखौ बियो खैफोदआव खोलैयो आरो लाजिबो फोनाडो। गथ’आ थानाय मोनब्ला आखायखौ नानानै होगौमोन। दा नाथाय गावनो गाव गैया जालांगोन।”</p>	</p>
<p>	<p>दसे उनाव बोराइआ हमदां मोननायसै दि नाया दिरुंखौ बोनो हमदों। बियो दिरुंखौ मोजाडै हमनानै फेन्दा सायाव बुज्राबनायसै। बियो नुनायसै दि दिरुंआ लासै लासै दैनि सा फार्से गाखौ बोगासिनो दं।</p>	</p>

<p>	<p>“ह’नै- बियो दैनिसा फार्से गाखो बागौ। फे-फे खाथिसिम फे।” बोराइया बुंनायसै। दिरुंआ समानै गोजौफार्से गाखोबोनाय दिडानि सिगां फार्से थानाय दैया धिप बाइदि जौबोनायसै। बिनि उन उन नाया हरखाब नुजाथिनायसै। नाया नुजाथिनाय लोगो लोगो बिनि मोदोमनिफ्राय रिमोनद्लानानै दै रेजेरनो हमनायसै। नानि खर’ आरो बिखुंआ रोजा फान्थाव गाबनि। फानैथिंजानि जोंखोल आस फोराबो फानथाव गाब बाइदिनो। सानदुं नांनानै मोदोमा जोंथामाथा जोंदों। गन्थं सानि थुंग्रि बाइदि गुनथुश्रिया बेस बलनि बैथार्जो समान गोलाव आरो सिगां फार्से गेददादा। मोनसे समाव नाया दै सायाव गौजाव फेबाय आरो हरखाब थब्ल’ फिनबाय।</p>	</p>
<p>	<p>नाजों लोगोसे दिरुंआबो हायलांनो हमदों हरजोंहर।</p>	</p>
<p>	<p>“दिडानिखुइ नै फुट गोलाव” बोराइआ बुंखांनायसै। नाया गियालना बोलांदों दिरुंखौ। बेराइआ नोजोर होदों दिरुंआ जाहाथे जेबो हेंथा गैया जासे दैसिडाव हाबलांनो हायो। बिनि खारथायखौ होबथानो हायाब्ला नाया दिरुंखौ बस’गोन। बेखायनो बियो मोजाडै दिरुडाव हमनायसै फारनैबो आखायजों।</p>	</p>
<p>	<p>बियो सानहाबबाय, “नाया एसे गेदेर दि बिखौ आं सिमान खालाम थारनांगोन। बिखौ आं खारनो होआ। नाया जुदि बिनि देहानि बोलोनि बाथ्राखौ मिबथि मोनो, होमब्लानिया बियो आरो गोख्रैसिन खारबावगोन। आं ना जानाय मोनब्ला बेखौनो मावगौमोन। आनान गसाइखौ साबाइखर दि बिसोर जोंनि खुइ बोलो गोरा सिन ब्लाबो सोलो गोनां सिन नडा।”</p>	</p>
<p>	<p>आगसि आखायजों दिरुंखौ हमनानै बोराइआ मोजाडै जिरायहाबबाय। बिनि उनाव आगदा आखायजों दाबाखौ दिहुनबाय। हाथर्खिनि जोंखोल सोराडाव ना थिमिखौ नुनो मोनदों बियो। नाखौ दिहुननानै लाबोनानै आगदा आखायाव</p>	</p>

	<p>थानाय दाबाजों नानि उदैखौ हाखावनायसै। बियो नानि उदैयाव नुनो मोननायसै मानै बिरग्रा ना। बिरग्रा ना मानैखौ ना थिमिनि उदैनिफ्राय दिहुननानै बोराइआ ना थिमिखौ बासिनायसै। नानि बेबु समफल' फोरखौ दैयाव गारहरनाय लोगो लोगो दै सायाव फसफरास बाइदि सोरांनि हांखो नुनो मोननायसै। ना थिमिआ जोबोर गुसु। आगदा आथिंजों नाथिमिखौ गसिनना लानानै लासै लासै बिगुर गारनानै गोदानायसै। बोराइआ बिरग्रा ना मानैखौ लैथोनि दैयाव सुनायसै आरो लोगोसे दैनि खारथायखौबो आनजाद खालामना नायनायसै। लैथोनि दैयाव गोजावखांनायसै बिनि आखायाव नांना थानाय नानि फसफरास बाइदि जोंखोल थाव। बियो मोन्दां मोनदों मोनदि दैनि खारथाया सेमबोनो हमदों।</p>	
<p>	<p>“नाया मेंहाबबाय; नोडाब्ला बियो जिराय हाबबाय। नाथिमिखौ जाथ'आ लासिनो दसे सम उन्दुनायानो गाहाम जागोन।” बोराइआ बुंबाय।</p>	</p>
<p>	<p>हाथखिफोरा नख्रांसानिफ्राय सोरां सारस्रि हरदोंमोन। गोजांनायाबो लासै लासै बांबोनो हमदोंमोन। बोराइआ मासे बिरग्रा ना लानानै दैयाव सुनायसै आरो बिनि उदैनि बेबुसमफल' आरो खर'खौ गारनानै आद्रा थानाय मानिखौ जानायसै। दरसे नाथिमिबो जानायसै। आरो बुंनायसै, “ना गोथां जानानै मोजां मोना; बिनि बेरेखायै संनाय नाया बेसे गोथाव! लोगोआव संर्रै आरो नेमु लायाब्ला बेबारनि बाइदि दिडा लानानै बाइजोआव ओंखारा।” दसे उनाव बियो सानफिननायसै, “लैथोनि दैखो दिडानि फायख'नाव दोननानै फोरानोब्ला संर्रै ओंखारगौमोन। नाथाय आं बेखौबो मावरोडाखैसै। बबेखानि, ना थिमिआ सान हाबनाय सिगां बोरसिआव नाडाखैमोन। गासै बाथ्राया जाबाय- आं थियारि</p>	</p>

	नडामोन। जायखि जादोला, आं नाखौ मोजाडै अरग्लि अरग्लि जादों। गोबानोबो ओंखाराखै।	
<p>	सानजा नख्राडाव जोमै नुजाथिदों। हाथखिफोरा थरफा थरफा गोमोर लांनो हमदों। आंनि दिडाया जेन' बबेबा गंसे जोमैनि हादोरावसो हाबहै दों। बोराइआ बुंनायसै, "सानथाम सानब्रैनि गेजेराव बारहुंखा बार जों लोगोसे अखाहागोन; बबेखानि दिनै आरो गाबोन हाया। नाया दलर थाथ'नाय समावनो दसे उन्दुलानो हानाय मोनब्ला मोजां जागौमोन।"	</p>
<p>	जंनि दिरूंखौ दिडायाव खानानै बियो जिराय थ'नायसै। बियो बुंनायसै, "आं सासे मेंहाबनाय बोराइ। खर'खौ मोजाडै लाखिनो हायोब्लासो हानाय। नाया आंनि फंबायमोन। आं जेब्ला बिखौ बुथारबाय, बिनि ग'लामि खाथिनोबो नांगोन।"	</p>
<p>	बियो सानबाय, "दा नाखौ दिडाजों मोजाडै खाफानानै न' फार्से गिदिं फिननांगोन। गथ'आ आंजों थाफानाय मोनब्ला नाखौ दिडा सायाव दैखानो नाजागौमोन। दिडाया दैजों आबुं जायोब्ला, गथ'आ दैखौ सारगौमोन। बबेखानि एसेगिंदिर नानो दिडा सायाव जायगा थोनाय नडा। लोगो आवबो रावबो गैया। आं हार्सिनो बिखौ बोबोनानै दिडाजों खाबथाफानांगोन। थांनाय समाव पालखौ- सौनांगोन।	</p>
<p>	गोबां साननि उनाव मोजां खाफाल दैबायग्रा, गोबां नाजानायनि नेर्सोनम'हरै नुजाथिफैदों बे नाया। बोराइया आंगो आखाइजों नाखौ दांनायनो लुबै दोंमोन। मोन्दांथिनो लुबैदोंमोन आरो दिडाजों खाजाब फानो लुबैदोंमोन। बियो बुंनायसै, "मोनसे जुजिनायनि फैसालि गोलेबाय। दा साननांगौ गैलिया। दा खामानिखौ ग'लामीजों फोजोबनो गोनांल' दंसै।"	</p>
<p>	बियो बथलनिफ्राय दै एसे लौसानायसै। नंख्रानि सानफारसे नायहरनानै बियो नुबाय, दासिमबो सानजुफु जायाखै।	</p>

	<p>फालांगिआरि बार बारनो हमदों। बियो न' सौहैमारनो गथ'खौ लोगो लाफानानै नाखौ बासिगोन आरो बेदर गोदागोन। बियो नाखौ दिडा सेरसिम बोबोनो नाजाबाय। बोयोसो बोयो हाया। बेखायनो दिडाखौ लासै लासै नानि सेर सिम जावलांनायसै।</p>	
<p>	<p>बियो नुनायसै- थारैनो मासे गेदेर ना। नानि अरथायखौ नुनानै बियो गावनि मेगन थायनैखौ फोथायनो हायाखैमोन। जंनि दिरुंखौ लासै खेवनानै नानि थुंग्रि बाइदि गुनथुथिआव खानायसै। दिरुंखौ खननानै जाबनै खालामनायसै आरो नानि साजों फाननानै दिडानि खुन्थियायाव मोजाडै खानायसै। नानि देहायाव सिगां फानथाव गाब आरो रुफाथि गाबनि गलाय मेन्देर नुनो मोनदों मोनब्लाबो दा बिनि गाबआ जाबाय रुफाथि। बिनि मेगनखौ पेरिस्क'पनि आयना बाइदि नुदों। मासे जेन' आंजां ना। हान्जा सुरनाय आंजां साधुफोर बाइदि।</p>	</p>
<p>	<p>बोराइआ देहाखौ एसे मोजां मोनदों। दा बियो बद' गैजायि जानो गिलिया। दै लौनाय उनावनो बियो मोजां मोनदों। बियो मोनदां मोनबाय दि नाया जिबा पाउण्ड सो गिलिर जागोन। बांसिन बो जानो हागौ। नाखौ फानथाम खालामनानै, फाननैखौ जानायनि थाखाय दोनब्लाबो, फानसेखौ फाननानै बेसे रां मोनगोन बेखौ बियो सनस' हायाखै। से पाउण्ड नानि थाखाय खमथारब्लाबो थामजि सेन्ट मोनथारगोनखिमोनथारगोन।</p>	</p>
<p>	<p>दिडाया समानै थांगासिनो दंमोन बारजों लोगोसे। बारा लासै बारदोंमोन, सा-सानजा मोखां फार्से। बोराइआ खनसे मोजाडै जिरायहाबनानै मोनदांमोनबाय दि बारा बिब्दि बारबायनो थागोन। बियो खनसे गोजान फार्से नायहरबाय : दिडा, पालसि आरो जाहाजनि ख'ला एबा उखिन्दै- जेबो नुहरा। दिडा सेर सेर सानसिनाय माखासे बिरग्रा ना आरो गोमोहाग्रानि अनगाथै बियो जेबो नुनो मोनदिया। गुवार नखाडाव मासे दाउबो</p>	</p>

	<p>नुदिया। देहायाव बोलो मोननो थाखाय बियो मार्लिनना मानैखौ लाबोनानै जानायसै। दसे उनावनो ज'रासे हाडर फैनायसै; बोराइआ बिसोरनि मासेखौ नुनो मोनबाय। बिनि खुगार्जो ओंखारबाय- 'आ-इ-या!' सोदोबा बोरै ओंखारदोमोन बुंस' हादिया। बिनि उनाव बियो बुंबाय "गेलानस् ?"</p>	
<p><p></p>	<p>बे खेबाव सेथि हाडरजो लोगोसे नैथिखौ बो नुनो मोनबाय। बिसोरनि लान्जाय फिदिंनाय आरो आखान्थिथामारि गांफोरखौ नुनानै बियो मिबथिमोनबाय दि हाडर मानैआ ख'दाल बाइदि गन्थं गोनां जाथोनि। नानि मोनामनाय मोननानै बिसोर थाथिरनो हाया जादोमोन। गेजेर गेजेर खनफा खननै गोरान्थिमावफ्रानानै बिसोर फासयनानै थालाडो आरो दसे उनावनो उन उन होसो फिनो। बिसोर उखैहाब थारनायमोन।</p>	<p></p></p>
<p><p></p>	<p>बोराइआ पालसिनि दिरुंखौ मोजाडै खानायसै। बियो बैथायाव दाबाखौ जं बाइदि खानानै लाखाबायमोन। बियो बैथाखौ लासै दैखाना लाबोनानै आखायजोहमबाय थाबाय। बियो आखाय फारनैआव सैनो हायि सानाय मोनबाय। बियो थानो हायि मोनबाय। खनसे बैथायाव गोरायै हमो आरो खनसे गुरै खालामना होयो। बाराइआ नुबाय हाडर मानैआ फैगासिनो दं। बेखेबाव बिसोरनि गोजो आरो खदाल हाथाय बाइदि खर'; बिखानि गोफार आरो गुफुर गांफोरखौ नुनो मोननाय जाबाय। बे जाथोनि हाडरा गिथावसिन। बिसोरनि देहाया गाज्जि मोनामो। बिसोर बुथारनानै आरो गोथै जुनारखौबो जायो। उखैद्रायबा बिसोर दिडानि बैथा आरो हालफोरखौ बोखानानै लानो नाजायो। एखनबा खासेव फोरा दै सायाव गोजावनानै उन्दुलाडो। हाडर फोरा बिब्दि उन्दुलानाय खासेवनि आंथि आखाय अरस'नानै जायो। उखैहाबनाय समाव बिसोर दैयाव ओंखारनाय मानसि मोनबोलानो बारसोमो।</p>	<p></p></p>

<p>	गथ'आ बुंबाय, “खाफाल दं- गैया- बेफोर नंखाय बाथ्रा। नायनाय नों खाफाला नोंखौ लोगो लाफैगोन।”	</p>
<p>	“न'नि मानसिनि बाथ्रा खोनासंनो गोनां जास्लाय स्लाय नों थाडिआनो गाहाम जागोन।”	</p>
<p>	“आं बेखौ खाथिर खालामा। मैया मानै ना हमखांबाय। दिनै सानैजों थांगोन ज'यै। नोंनिफ्राय आंहा गोबां सोलौनो गोनां दं।”	</p>
<p>	“ना हमनो थाखाय दिडायव गंसे मोजां जंगर नांगौ। गोजाम फर्द गाडिनि बायखोन्दा स्पीजों मोजां सेखा दानानै लानो हायो। बेजों गंसे सेखा दानानै जोनजोन उननांगोन गुवानाबेक'आव। नाथाय बेयो गोबौ आरो बायनो रोडि जानाया गाहाम। आंनि दाबाया बायस'बाय।”	</p>
<p>	“जागोनदे, आं दाबा गंसे नागिरनानै लाबोगोन आरो गंसे स्पी लाबोगोन। बुंनाय, बिब्दि गोसा बार आरोबाव सानब्रैसे बारगोन ?”	</p>
<p>	“एसेल'सिनथारब्लाबो सानथाम। बांसिनबो जानो हागौ।	</p>
<p>	गथ'आ बुंनायसै, जायोब्ला गाहाम। नों आखाइ फारनैखौ मोजां खालामनानै लागो।”	</p>
<p>	“आखाइनि जोथोन लानाय जागोन। बिनि राहा दं। हराव माबा सोमोनांथाव बेसातआव सुदोंमोन। बे समाव बिखानि माबा मोनसे बाहागो बायस'नाय बाइदि मोनदोंमोन।”	</p>
<p>	बोराइआ बुंबावनायसै, “बे साननैसोआव रादाब बिलाइ नायनो मोनाखै। गासैखौबो लाबोजोब।”	</p>
<p>	गथ'आ सौंनायसै, “नों जोबोर जारला सैनो गोनां जादोंमोन, नडासै ?”	</p>
<p>	“हो.....”	</p>
<p>	“मोजाइँ जिरायनानै ला। आं रादाब बिलाइ आरो खाजा नागिर	</p>

	हैनो। मुल्लिनि ग'लानिफ्राय आखायाव फुन्नो थाखाय मुलि बायनांगोन।” गथ'आ बुंनायसै।	
<p>	“पेट्रिक'खौ बुंनो दाबाव दि नानि खर'आ बिनि भागोनि। बिनो दाबाव।”	</p>
<p>	“गोसोआव दं।”	</p>
<p>	गथ'आ दरखं बारनानै ओंखार लांबाय बालाजों खोनाय लामाजों। बिनि मोखाडा गाबहां गाबहां जादोंमोन।	</p>

</body></text>

</Doc>